

Lili Prince ta muestra preocupacion di WKF: Tin pacient cu apenas 14 aña di edad cu cancer na stoma!

ORANJESTAD (AAN) — Señora Lilian (Lili) Prince, presidente di e Fundacion Wilhelmina Kanker Fonds, den entrevista cu Matutino DIARIO a expresa cu e tema di cancer na stoma, cada dia ta bin mas dilanti.

E dama a menciona esaki den e contexto di e charlanan organiza pa WKF tocante e tema menciona, diasabra ultimo den e ballroom di Alhambra.

Manera ta conoci e oradornan tabata dr. Deepu Daryanani, Oncologo y Cirujano; dr. Edgar Caceres, Gastroenterologo y sra. Angelique Salsbach, Nutricionista.

Sra. Prince a agrega cu luna di Maart tabata e luna di cancer di tripa, y na momento cu el a puntra dr. Caceres cual ta e tema pa referi na dje durante e charlanan, el a muestra cu mihor papia tocante cancer di stoma.

E dama a subraya cu awendia tin hopi persona cu sintomanan cu na final ta cay na problema di stoma. Wilhelmina Kanker Fonds ta conciente cu cancer di stoma ta afectando mas y mas hende hoben, y tur esaki ta basa riba e estilo di bida di nos hendenan.

El a menciona cu nos hubentud ta come loke ta mas lihe y mas facil y nos tur tin cu wak kico nos ta come, pasobra den pasado no tabata tin tanto caso di cancer di stoma manera awor.

Awendia, mainta tempran na luga di cuminza cu bebe un of dos glas di awa pa laba e tripanan, nan ta cuminza cu bebe un refresco gaseoso masha popular.

Cancer na stoma ta tuma su tempo, pero ora e ta yega ta surgi un brote grandi cu hopi caso di cancer na stoma.


Hopi hende hoben ta acercando WKF, pasobra ora nan bay afo cu nan mayornan e ora ey alarma ta bati. Tin mucha di 14 aña ya caba tin e malesa, y sra. Prince a expresa cu casonan

asina ta spanta bo pasobra antes nos tabata papia di malesa di hende grandi, pero awendia nos ta papia di hoben.

Sra. Prince a indica cu esaki ta un preocupacion di WKF tin, pero tambe e ta respeta nos comunidad pasobra e sentimento cu nos hendenan tin ta cu nan no ta gusta pa tur cos wordo habri y no ta duna publicidad na esaki.

No obstante, mester cuminza cu prevencion y concientizacion di e tiponan di cancer cu tin aworaki.

Como consejo pa nos pueblo sra. Prince a expresa "Abo ta esun cu conoce bo curpa, bo conoce ora cu bo come ki sorto di reaccion bo tin, si bo tin algo cu bo ta mira cu no ta



bon, acudi cerca bo docter di cas y pidie mesora pa pasa bo pa e especialista. No warda, no vacila!" sra. Lili Prince a remarca.